

ISCARTA YA' SANTIAGO

Yicheb'anil iscarta ya' Santiago

1 ¹Hanin Santiago inti'an, ischejab' Komam Dios yeb' Komam Jesucristo wehan. Chinq'amb'ehan teyet hanik' heyeh yinh hekawil, hex kab'-lahonheb' majan wet konhob' Israel, hex pujanexto yul sat yib'anhq'inal ti'.

Hune' helanile chaq' Komam Dios

²Hex wuxhtaj, hex wanab', hayet chihul tzijxanche ilweb'al teyib'anh, kaw aq'we tzalaho hek'ul sik'leb'il. ³Heyohtaj ta hayet chul ilweb'al teyib'anh yu yil-laxi ta ayko Komam Dios yipo heyanna, hak tu' chu hekuyni istecha ilweb'al heyu. ⁴Yilal helahniko heyaq'ni heyanna istecha heyu, hak tu' chu hech'ib' yinh yet Komam Dios, yeb' xin tz'ajan chexelkaniko yinh isk'ulal Komam, hak tu' xin matxa nich'ano tzet mach tz'ajanoj hex yinh yet Komam.

⁵Tato ay hunujex maxhto tz'ajano hehelanil, q'anwe tet Komam Dios, kat yaq'ni Komam teyet, yuto mach chismale Komam yaq'ni tet makta chiq'anni. Chaq' Komam tet, yaj mach chaliko Komam yinh sat mak b'ay chaq' Komam hune' tu'. ⁶Hayet chikoq'anni kohelanil tet Komam, ko-q'anawe yinh sunil janma. Machojab' chikab'kon janma, yuto ha' mak chikab'kon yanma, lahan haka' ha' mar ch'ek' job'la yu jaq'eq'; nanantax-anche b'ay chitokanikoj. ⁷Ha' mak hak tu' yekoj, tajka ch'ek' yinh isnab'al ta ay tzet chischah tet Komam Dios Jahawil. ⁸Yuto nan ch'ek' yinh isnab'al tinanh, nanxapaxo ch'ek' yinh isnab'al hekal, hak tu' xin mach t'inhano yeko yinh isb'eyb'al.

⁹Tato ay hunu juxhtaj maka hunu janab' ya'ta yehi, yilal yaq'ni tzalaho yanma yinh Komam, yuto ay yelapno ye yul sat Komam Dios. ¹⁰Hakpax tu' eb'naj juxhta yeb' eb'ix janab' q'alom, tzalahojob'i yet chi'ilaxayo yu Komam Dios, yuto ha' mak q'alom lahan haka' isxumakil te' telaj machi nahatli. ¹¹Yuto hayet chi'ahilo tz'ayik kat ispohkanh yip q'a', chitajilo te' telaj, kat yay hona isxumakil te', hak tu' xin matxa k'ulch'ano jilni te'. Haka' ishowayo isxumakil te' telaj tu', hak tu' isk'ayayo eb'naj q'alom yet chiskutxb'an eb'naj isq'alomal yul sat yib'anhq'inal ti'.

Ilweb'al yeb' ej isya'tajil

¹²Saq'al yet mak chitecha ilweb'al yu, yuto hayet chilahwi istecha ilweb'al yu hune' mak tu', chaq' Komam hune' ispaj selet tet, ha' ton hune' isq'inal mach istanhb'al, ha' ton hune' corona halteb'il yu Komam tet mak chitzala yinh Komam. ¹³Hayet chonhmontelax kowatx'en hunu istx'ojal, machojab' hijala ta ha' Komam Dios chonhmonten kowatx'en hune' tu', yuto Komam mach chu konhismonten kowatx'en hunu istx'ojal, machipaxo tzet chimonten Komam yu yaniko ismul. ¹⁴Wal xin, ha' istx'ojal ayko jinh ha' chonhmonteni, kat konhyinito yinh istx'ojal. ¹⁵Ta hijako janma yinh istx'ojal aytik'ako jinh, yinh chipitzk'ati komul. Haxa yet chich'ib' hune' istx'ojal yul janma tu', kat yul hune' kamikal jinh.

¹⁶Wuxhtaj wanab', hex kaw xahan ay wuhan, mach cheyaq' sub'chaho heb'a. ¹⁷Sunil tzet k'ul yeb' sunil tzet tz'ajan yehi tet Komam Dios chikochah. Ha' Komam watx'enhe sunil tzet chimujli yul satkanh. Ha' hunteq'an tu' xin chishel isb'a, wal Komam Dios, hune'nhetik'a ha' Komam. ¹⁸Yuto el yinh isk'ul Komam yaq'ni koq'inal mach istanhb'al yu Istzoti' kaw yeli, hune' yaq' jet yet kochahni yul janma. Yu hune' tu' xin, hanhonh kaw b'ab'elonh sata sunil tzet watx'eb'il yu Komam Dios.

Yilal koyijen tzet chal Istzoti' Komam Dios

¹⁹Wuxhtaj wanab', hex kaw xahan ay wuhan, hajb'awe hetxikin cheyab'eni, yaja' machojab' komono cheyal hunu tzet ye tu' yinh anhe, mach komono chitit hehowal. ²⁰Yuto yet chitit kohowal, maxhtaj istoholal tzet choche Komam chikowatx'e. ²¹Yuxin b'ejwekano sunil istx'ojal yeb' sunil ismachiswalilal kaw chipoh yul yib'anhq'inal ti'. K'ulch'anojab' chu hechahni Istzoti' Komam Dios chal-lax teyet, hune' tz'unb'ilxa yul heyanna yu Komam, yuto ha' chexkolni tet sunil istx'ojal.

²²Machojab' tonhe cheyab'e Istzoti' Komam, wal xin yilal heyijeni. Yaj tato tonhe cheyab'e tzet chala, mach cheyijepaxoj, hexkawex cheyaq' sub'chaho heb'a. ²³Ha' mak chi'ab'en Istzoti' Komam Dios, mach chis-watx'epaxo tzet chala, lahan haka' hunu mak chiyil sat yul ch'en espejo, ²⁴yaja' lahwi yilni sat tu', kaw yinh anhe chito nahul yu tzet yil-lax sat. ²⁵Wal mak mach chito nahul Istzoti' Komam Dios yu, to kaw chako yinh isk'ul yinh hune' tzet chab'e tu' kat isyijeni, kaw saq'al yet; ha' Istzoti' Komam tu' chexb'ejtzonilo yul isq'ab' ismachiswalilal.

²⁶Ta ay hunu mak yijem yinh tzet chal Komam Dios yalni, yaj ta mach chaq' kacha' isti' yinh istx'ojal, ha' hune' anma tu' chiyaq' sub'chaho isb'a ischukil. Hak tu' xin nab'anhe chala tato yijem yinh tzet chal Komam Dios. ²⁷Yaj ta chonhkolwa yinh nixhte meb'a' unin, yeb' yinh eb'ix hunix ayko yinh ej isya'tajil, kat xin kopohnilo kob'a yinh istx'ojal yul sat yib'anhq'inal ti', wal tu' kaw lanhan koyijen tzet chal Komam Dios Mame.

Lahannhehojab' koxahannhen anma

2 ¹Hex wuxhtaj, hex wanab', hex xahechah Komam Jesucristo yul heyanna, Komam kaw ay yelapno yehi, lahannhehojab' hexahannhen heb'a hesunil. ²Q'inalo ta kutxanexikoj kat yapni hunu naj q'alom, kaw nanxa islow jilni xil isq'ap aykoj yinh yeb' ayko hunu isjolq'ab' nab'a oro, lahwi tu' kat yokpaxapno hunu naj kaw meb'a', kaw xilxa xil isq'ap aykoj. ³Kaw xin k'ul chu hechahni naj nanxa islow jilni xil isq'ap ayko yinh tu', kat heyalni tet naj: «Tz'onhyanh yib'anh hune' xhila kaw k'ul ti',» ta kexchi. Wal tet naj meb'a' xin cheyal haka' ti': «Wal halinhi b'ey tu',» maka «Ayanh tz'onhno sat tx'otx',» ta kexchi. ⁴Ta hak tu' cheyute, mach lahano chexahannhe eb'naj juxhtaj yeb' eb'ix janab'. Ha' xin chaln-iloj ta chexok heyila' yinh tzet ye heyet anmahil, tx'oj xin chenako yinh.

⁵Hex wuxhtaj, hex wanab', txumweloj tato ha' Komam Dios sik'nikanh anma meb'a' ay yul sat yib'anhq'inal ti' yu yaq'ni Komam isq'alomal tet yinh yanayto yul yanma yinh Komam, kat ischahnipaxo yehob'al b'ay ch'ok Komam Yahawil, hune' yalte Komam tet mak ch'ocheni. ⁶Wal hexpaxo xin cheyah eb'naj meb'a', machi yelapno eb'naj yul hesat. ¿Mak anmahil chexetani, kat kexyinito sata naj alkal? Ha' ton eb'naj q'alom. ⁷¿Tom mach heyotajoj tato ha' eb'naj tu' tx'oj istzotel yinh Komam Jesucristo ayxako yul janma?

⁸Ta kaw yeli cheyije isley Komam Dios haka' yalni Yum Komam b'ay chala: «Xahan cheyil heyet anmahil haka' heya'ilnhen heb'a,» xhikanoj. Ta hak tu' cheyute kaw k'ul heyekoj. ⁹Yaj ta mach lahano chexahannhe heb'a, cheyako hemul, kat hekanpaxkano tx'ojal tet isley Komam Dios.

¹⁰Ta chijala ta sunil ley chikoyije, yaja' ta ay hunuxa chejb'anile mach chikoyije, chijako komul yinh sunil ley haka' tu'. ¹¹Yuto ha'tik'a Komam Dios halni: «Mach chexixli, mach chexpotx'wipaxo kamo anma,» xhi Komam. Yuxin ta ay mak mach chi'ek' ixloj, yaja' ta chispotx'kamo yet anmahil, chiyako ismul tet ley haka' tu'.

¹²Yuxin nannhe heyu yinh tzet cheyala', yeb' yinh tzet chewatx'e, yuto yilal yixtanhwiti yu hune' ley yet Komam Jesucristo. Hune' ley xakonh-b'ejtsoniko yinh kowatx'en tzet choche Komam Dios. ¹³Ta mach chitz'ay kok'ul yinh jet anmahil, mach chitz'aypaxo isk'ul Komam jinh yinh hune' tz'ayik yet chiyilni Komam Dios yinh tzet chi'eliko anma. Yaj tato chitz'ay kok'ul yinh jet anmahil, chitz'aypaxo isk'ul Komam jinh.

Mach tonhehojab' chonhtzoteli yilal kowatx'en tzet chijala

¹⁴Hex wuxhtaj, hex wanab', tzet chaliloj ta ay mak ayko yanma yinh Komam yalni, yaj ta machi nich'ano isk'ulal tzet chiswatx'e, ¿tom xin chikolchahi yu ayxa yanma yinh Komam yalni? ¡Machoj! ¹⁵Q'inalo ta ay hunu juxhtaj maka hunu janab' machi xil isq'ap, maka matzet chislo,

¹⁶kat heyalni tet: «Chawil hab'a, k'ul chawute haq'uxni hab'a, wa'anh yinh kaw k'ul,» ta kexchi. Matzet xin cheyaq'paxo tet, ζtzettaxka chalilo hune' tu'?

¹⁷Yuxin ta ay hex cheyala ta ayko heyanma yinh Komam, machi xin chewatx'e isk'ulal, nab'nhe cheyala ta ayko heyanma yinh Komam Dios; matzet chalilo hune' tu'.

¹⁸Q'inalo ta ay hunu mak chihalni: «Ayko wanmahan yinh Komam.» Haxa hunxa mak xin chalpaxoj: «Isk'ulalnhe chinwatx'e'an.» Chiwalan teyet, mach ayoko Komam Dios yipo heyanma ta mach chewatx'e isk'ulal. Wal xin chinyehan teyet ta ayko Komam Dios yipo wanmahan yu chinwatx'ehan isk'ulal.

¹⁹Hex ti', cheyayto yul heyanma tato hune'nhech'an Komam Dios. Kaw k'ul hune' tu', yaj maxhnhetaj hune' tu' yilal yehi. Hakpax tu' eb'naj ischejab' naj matzwalil, yohta eb'naj tato hune'nhech'an Komam Dios. Kaw xin chiluylunkanh eb'naj xiwkilal yet chisnani eb'naj Komam. ²⁰¡Tzet hesukal! Cheyala ta ayko heyanma yinh Komam, machi xin cheb'eyb'alnhe tzet choche Komam. Ha' xin chalniloj ta machi heyanma yinh Komam.

²¹Naweti yinh jichmam Abraham; isyije ya' yinito isk'ahol Isaac, yinh xahanb'alil. Yu tzet iswatx'e ya' tu', yuxin okkano ya' k'ulal yul sat Komam Dios. ²²Hak tu' xin chu johtanheniloj ta yako yanma ya' Abraham yinh Komam Dios, yuto isyije ya' tzet aq'lax iswatx'e, hak tu' xin yu isyenikanilo isb'a ta ayko yanma ya' yinh Komam Dios. ²³Hak tu' yu yijni isb'a yinh tzet halb'ilkano yul Yum Komam Dios b'ay chala: «Kaw yako yanma ya' Abraham yinh tzet yal Komam Dios, yu hune' tu' xin kankano ya' k'ulal yul sat Komam,» xhikanoj. Yuxin yakaniko Komam ya' Abraham tu' yamigohoj. ²⁴Yuxin nachahojab'ilo heyu tato chonhkankano k'ulal yul sat Komam Dios yu tzet chikowatx'e, maxhnhetaj yu janiko janma yinh.

²⁵Hak tu' yupaxo hune' ix ix tx'oj ye iswi', Rahab isb'i. Kankano ix k'ulal yul sat Komam Dios yu yaq' ix b'ay way eb'naj ischejab' ya' Josué, yeb' xin nanxa b'ehal b'ay ischejto ix eb'naj yunhe mach chitzab'cha eb'naj. ²⁶Haka' hunu nimanile matxa yanma ayiktoj, kamomxa, hak tu' ye hunu mak chihalni ta ayko yanma yinh Komam Dios, mach chisyije-paxo tzet chal Komam, nab'anhe hune' tu'.

Ismul jaq'

3 ¹Hex wuxhtaj, hex wanab', mach komono cheyocheko heyok kuywawomal, yuto heyohtaj ta hanhoh chonhkuywahi kaw ek'b'alto chi'il-lax yinh tzet chikowatx'e. ²Kosunil ayto nixhtexa kotx'ojal yinh tzet chikowatx'e, yaja' ta ay mak mach ch'ayk'ay yinh istzoteli, ha' hune' mak tu' kaw k'ul, yuto chupaxo isq'oji iskachni sunil isnimanil yinh ej istx'ojal.

³Chijakto ch'en freno yul isti' no' cheh yunhe isyijen no' tzet chijoche. Hak tu' xin sunil isnimanil no' chito b'ay chal kok'ul. ⁴Haktik'apax tu' te' barco kaw nimej te' yaj waxanhka chul tinhna jaq'eq' yinh te' yaj hanhech'an nich'an timón chisb'aq'o naj chi'inik'o te' ha' b'ay chisyije te', kat isto te' b'ay chal isk'ul naj. ⁵Hak tu' ye nich'an jaq' ti', kaw nich'anch'an yaj kaw kanhye sik'leb'il, haka' hunu nich'an tz'itq'a' chu isnhusnilo hunu niman q'eb'talaj. ⁶Hak tu' ye jaq' ti', lahan yeb' q'a q'a', mach isb'i hanta istx'ojal ayko yinh; yeb'i konimanil yehi yuxin sunil konimanil chu yetaxto yu. Hune' q'a q'a' tu', haka'tik'a yul hune' niman q'a' mach istanhb'al chitit isq'aq'al, hak tu' xin chu yetaxkanto sunil kob'eyb'al.

⁷Hanhonh anmahonh ti' chonhq'oji kokuyuni sunil ej no' xoltelajil noq'; no' ch'ik, no' lab'a yeb' ej no noq' ay xol ha' mar. ⁸Yaja' wal jaq' ti' xin, mach chonhq'oji kokuyuni. Lahan yeb' hunu istx'ojal mach chaq' kacha' isb'a, lahan haka' veneno chonhaq'ni kamoj. ⁹Ha'tik'a jaq' ti' xin, chalni k'ul-la tzoti' yinh Komam Dios Mame, ha'tik'a xin chihalni tzoti' tx'oj yinh jet anmahil watax'eb'il yu Komam Dios. Ha' anma tu' xin, yechel Komam yehi. ¹⁰Yul koti' ch'elti tzoti' k'ul, yultik'apaxo koti', ch'elpaxti tzoti' tx'oj. Wal xin wuxhtaj, wanab', mach cheyute heb'a haka' tu'. ¹¹Haka' hunu isnuq' ha ha' tinanh, mach chi'ahilo ha ha' chi' yeb' xin ha ha' k'ah. ¹²Hakpax tu' hunu yoj te' higo, mach chu yaq'ni te' sat te' aceituna, yeb' hunu yoj te' uva mach chu yaq'ni te' sat te' higo. Hakpax tu' isnuq' hunu ha ha', mach chu yahilo ha ha' chi' yeb' xin ha' k'achi'.

Kohelanil chitit tet Komam Dios

¹³Ta ay hunu mak texol kaw ay isnab'al yeb' xin kaw ay ishelanil, isyeb'ab'ilo yinh isk'ulal chiswatax'e, yiq'ab'ayo isb'a yu hune' ishelanil tu'. ¹⁴Yaj ta aynhetik'ako chichonk'ulal kaw k'ah yul heyanna, yeb' xin ek'b'al cheyute heb'a yib'anh heyet anmahil, kat xin heyalnipaxo heb'a k'ulal, wal xin kaw leq'ti' hex. ¹⁵Matxataj tet Komam Dios chitit hune' yitz'atil wi'e tu', to yetxa sat yib'anhq'inal ti' yehi, yetxa anma ye hune' yitz'atil hewi' tu', yinh naj matzwalil chitita. ¹⁶Ta aytoko chichonk'ulal jinh, yeb' xin ta hanhonhnhe chijoche ch'ok kowinajil, ta hak tu' mach lanhano kob'elwi yinh istx'ojal, kaw xin ayto sunil istx'ojal jinh.

¹⁷Ta tet Komam Dios chitit kohelanil, matxa chonhek' yinh istx'ojal, wal xin chonhek' yinh aq'ank'ulal. K'ulch'an chijute kok'ul, kat istz'ay kok'ul yinh jet anmahil, lahanpaxo jet anmahil yul kosat, yeb' xin ist'inh-anilnhetik'a chijala. ¹⁸Ta aq'ank'ulal chikowatax'e, chikochah ispaj, ha' ton istoholal.

Mach chu heyetb'inhen heb'a yeb' istx'ojal

4 ¹¿B'ay chititiko nimeta howal yeb' xin nixhte howal texol? Wal xin yu hunteq'an istx'ojal chimunla yul heyanna yuxin cheyaq'le

howal. ²Hex ti' tzijxanhe tzet ye tu' cheyochekoj, yaj mach chexq'oji yinh, yu hune' tu' xin chi'ek' yul hewi' hepox'wahi, yeb' xin chichiwako hek'ul yinh mak ay tzet aya. Yu mach chu yok heyetoj, yuxin ch'ah howal texol. Wal xin mach ch'aq'lax teyet tzet cheyoche tu' yu mach cheq'an tet Komam Dios. ³Waxanhka cheq'ana, yaj mach ch'aq'lax teyet yuto mach k'ulo chu heq'anni, yuto yu heyetano yinh istx'ojal cheyoche.

⁴Hex ti', kaw mach yijemo hex, yuto kaw cheyocheto heyok hewatx'eno tzet ye tu' tx'oj ay yul sat yib'anhq'inal ti'. Yu hune' tu' xin, chexokkano howal yinh Komam Dios. ⁵Tajka ch'ek' yinh henab'al tato machi nich'ano tzet yelapno ye Istzoti' Komam Dios tz'ib'nheb'ilkano yul Hum, b'ay chala: «Ha' Komam Dios anhekaniko Komam Espíritu Santo jinh, Komam Espíritu tu' xahan ayonh yu, yuxin choche Komam ta hanhe Komam chikoxahanne,»^a xhihayoj. ⁶Yu isk'ulch'anil isk'ul Komam, yuxin chikolwa Komam jinh. Chalnipaxo yul Yum Komam haka' ti': «Chitit ishowal Komam yinh anma kaw leq'ti' chute isb'a. Walpaxo mak chiyo isb'a xin, kaw chitzala Komam Dios yinh,»^b xhihayoj.

⁷Yuxin yijemojab' chijute kob'a tet Komam Dios, kat kopahnito naj matz-walil, hak tu' xin ch'elkanh naj jet. ⁸Hitzojonhweko isk'atanh Komam Dios, haxinwal chihitziko Komam kok'atanh. Hex mulum, takojab' hek'ul teyinh yu istx'ojal chewatx'e. Haka' hexpaxo chito heyocheto yet yul sat yib'anhq'inal ti', kat hexahannhenpaxo Komam heyalni, kaw yilal hesajnhen heyanna yul sat Komam Dios. ⁹Okojab' b'isk'ulal yinh heyanna, takojab' hek'ul yet chenani-tij. Oq'anhwe sik'leb'il yu hemul hex kaw xakextzeb'i yu heyochen istx'ojal. Okanhwe yinh oq'il hex kaw chextzala sik'leb'il yinh tzet chaq' hune' yul sat yib'anhq'inal ti', meltzanhweko yinh b'isk'ulal. ¹⁰Iweyo heb'a tet Komam Dios, hak tu' xin chexilaxkanh yu Komam.

Machojab' cheyal-le heq'umal

¹¹Hex wuxhtaj, hex wanab', mach cheyal-le heq'umal hunun hex; yuto ta ay mak chihalni isq'umal yuxhtaj maka yanab', lanhan yalni isq'umal chejb'anile yet Komam Dios. Maka ta cheyala ta mach k'ulo yeko hunu heyuxhtaj maka heyannab', lanhan heyalni tato chejb'anile yet Komam mach k'uloj. Hak tu' xin lanhan heyanniko heb'a juesal yinh chejb'anile yet Komam tu', mach xin lanhano heyijeni. ¹²Ha' hune' mak aq'nhe chejb'anile tu', ha'tik'a xin ayko juesal. Ha' xin chu yaq'ni kolb'anile yeb' xin chu konhyaniko yinh isya'tajil. Wal hunujonh xin mach chu jok jilno tzet chi'eliko hunu juxhtaj maka janab', yuto hanhk'anhe Komam Dios chu yilni tzet chi'elikoj.

Mach johtajo tzet jeko hekal kab'e

¹³Ab'ewekanoj hex cheyal haka' ti': «Yet hekal maka yet kab'e chonhto munil yul hune' niman konhob' yinh hunu hab'il. Ha' b'ey tu' xin chijako

^a 4:5 Ex. 20:5; Dt. 4:24 ^b 4:6 Pr. 3:34; 1Pe. 5:5

hunu niman kotxonh, hak tu' xin kaw niman komelyu chikokutxb'a,» kexchi. ¹⁴Yaja' mach heyohta tzet heyeko yet hekal maka kab'e. Saq'al heyalni, yaja' kokawil yul sat yib'anhq'inal ti', lahan yeb' niخته mo-yan, tonhe chisyeb' isb'a hunep kat isk'aykanh. ¹⁵Ha' hune' wal heyalni: «Ta chi'el yinh isk'ul Komam Dios Jahawil, aynhetik'a kokawil, chikowatx'e hune' ti' maka hune'xa tu',» ha' hune' tu' wal heyalni. ¹⁶Yaja' hex ti', mach hako tu' heyalni, to ha' hune' cheyala: «Chikowatx'e hune' ti', kat kowatx'en hune'xa tu',» kexchi yul heyet hechukil. Ha' xin chalniloj ta mach cheyiyo heb'a tet Komam Dios. Kaw xin tx'oj hune' tu' yul sat Komam.

¹⁷Ta johtaj ta k'ul kowatx'en hunu tzet ye tu', tzujan tu' xin mach chikowatx'epaxoj, chijako komul yul sat Komam Dios.

Tzet ch'eliko eb'naj q'alom

5 ¹Hex q'alom hex ti', ab'ewekanoj. ¡Oq'anhwe yinh kaw ip teyinh yuto lanhan yul istiepmohal b'ay ch'ek'oya' heyanna! ²Sunil he-q'alomal lanhan isq'atoj, haxa sunil xil heq'ap lanhan isk'uxnito no' ih. ³Sunil hemelyu tenb'ab'il xin, ayxa isq'uxewal ch'en, ha' chinhuswaho teyinh yul sat Komam Dios kat kexistanhtzeniloj, haka' istz'ato hunu tzet ye tu' yul q'a'. Ha' heq'alomal tenb'ab'il heyu tu', ha' ch'oko aq'ok'ule teyinh yinh islahob'al tz'ayik. ⁴Hanta istohol eb'naj hemunlawom mach heyaq' yinh hemunil. Ha' hune' tu' xin chitit istz'akti'al teyib'anh, yuto xayab'e Komam Dios yel yaw eb'naj munlawom tu', Komam yahawil yinh eb'naj ángel ay satkanh.

⁵Hex q'alom hex ti', kaw xaheyaq' yoche heyanna yul sat yib'anh-q'inal ti', yinh sunil tzet cheyoche. Kaw b'aq'ich hexxa, haka' no' wakax kaw b'aq'ich, lanhanxa yapni istiepmohal ispotx'laxi. ⁶Hex q'alom hex ti' chekawxeko ismul anma yib'anh, hunteq'an isk'ulalnhe chiswatx'e. Cheyaq'nipaxo kamo eb'naj yu mach chu iskolni isb'a eb'naj teyet.

Nimanojab' cheyute hek'ul masanta yet chul Komam Jesucristo

⁷Hex wuxhtaj, hex wanab', niman cheyute hek'ul masanto yet chul Komam Jesucristo; haka' chu hunu naj munlawom niman isk'ul naj yechman yaq'ni ha' b'ab'el nhab' yeb' ha' islahob'al nhab'. Nimanpaxo chute isk'ul naj yechman yelilo sat istz'unub'. ⁸Hakojab' tu' cheyute, nimanojab' cheyute hek'ul. Linhb'awe heb'a yinh Komam, yuto toxa chul Komam Jahawil.

⁹Wuxhtaj, wanab', mach chexok aq'ok'ule teyinh hunun hex, haxinwal yet ch'apni istz'ayikal yil-laxi tzet chexelikoj, mach hemul ch'ilcha yu Komam. Yuto ha' Komam alkal yekoj, kawilxa yeti Komam.

¹⁰Wuxhtaj, wanab' ha' eb'ya' ischejab' Komam Dios halni Istzoti' Komam yet payat techa yu eb'ya' yijlen isya'tajil, kaw aypaxo isnimanil

isk'ul eb'ya'; yuxin techahojab' heyu haka' yaq'le eb'ya' tu'. ¹¹Ha' mak ay isnimanil isk'ul istecha isya'tajil yu, chijalanh ta kaw saq'al yet. Hex ti' xaheyab'e yinh tzet yu istecha isya'tajil yu ya' Job, heyab'enpaxoj tzet yu iskolwa Komam Dios yinh ya' yet tzujanxa, yuto kaw k'ul Komam Dios yeb' xin chitz'ay isk'ul Komam yinh anma.

¹²Wal xin hex wuxhtaj hex wanab', ay hune' kaw yilal yehi, ta ay tzet choche hek'ul cheyala mach cheyaq' b'inaho satkanh maka tx'o tx'otx' maka hunuxa tzet ye tu' yaq'ni isb'a yinh tzet cheyala. Hayet cheyalni *ho'* yelobjab' cheyala. Hayet cheyalni *machoj*, machobjab'i; haxinwal mach chexyato Komam yinh isya'tajil.

¹³Ta ay hunujex b'isk'ulal heyehi, okanhwe txahloj. Taka tzalahilal heye xin, b'itnhewe Komam Dios. ¹⁴Ta ay mak ya'ay, yawtehab' eb'ya' anciano yet iglesia. Haxa eb'ya' anciano tu' xin, chitxahli yinh, kat ismasniko eb'ya' aceite yinh mak ya'ay tu' yinh isb'i Komam Jesucristo Jahawil. ¹⁵Hayet chextxahli yinh sunil heyanna xin, chikawxikanh hune' mak ya'ay tu', ha' Komam Jahawil chi'inikanh, ta ay ismul xin, chaq'kano nimank'ulal Komam yinh.

¹⁶Yuxin yilal heyal-lenati hemul teyet hunun hex, kat hetxahli yinh eb'naj juxhtaj yeb' eb'ix janab' tet Komam, kat heyanhchakanoj. Yuto eb'naj tohol isb'eyb'al yul sat Komam Dios, hayet chitxahli eb'naj yinh sunil yanma, kaw niman isyaxil chaq'kano Komam yu istxah eb'naj tu'.

¹⁷Haka' ya' Elías ischejab' Komam Dios yet payat, anma ya' haka' hanhoh ti', yaja' yinh sunil yanma ya' txahli tet Komam Dios yunhe mach chaq' ha' nhab'. Yuxin mach yaq' ha' nhab' yikta iskanh hab'il. ¹⁸Hato yet istxahlipaxo ya' hunelxa yichipaxiko yaq'ni nhab'. Hak tu' xin yaq'ni sat tz'unub' hunelxa.

¹⁹Hex wuxhtaj, hex wanab', ta ay hunu mak texol chishek'ilo isb'a yinh Istzoti' Komam, aypaxo xin hunujex chexok tzotelo tet, kat ismeltzoko yul isq'ab' Komam hunelxa. ²⁰Ohtanhewekaniloj tato ha' hune' mak ch'inilo hunu naj mulum yinh istx'ojal b'ay aykoj, lanhan iskolchalo hune' mak mulum tu' yul isq'ab' kamikal. Hak tu' xin tx'i'alpaxo ismul hune' mak tu' chitanhkano yul sat Komam Dios.